

ПРЕПОЛОВЕНИЕ ПЯТДЕСЯТНИЦЫ.

В ВТОРНИК 4-Й СЕДМИЦЫ ПО ПАСХЕ

На Господи возвах: поем стихиры праздника на 6, глас 4-й:

Наста Преполовление дней * от Спасительного начинаемых Возстания, * Пятдесятницею же Божественною печатаемое, * и светится, светлости обоюду имущее и соединяющее обоя, * и приити славе предъявляющее, * Владычняго Вознесения предпочитает. [Дважды.]

Слыша и возвеселися Сион, * благовестившуся Христову Воскресению, * вернии же его сынове возрадовашася, * сего видевше, * омывающа духом скверну христоубийства, * готовится, торжествующе, * обоих веселое Преполовление. [Дважды.]

Приблизися Божественнаго * изобильное излитие на всех якоже написася, Духа: * Предъзаконение проповедует преполовившееся, * по Христове смерти, и погребении, и Воскресении, * от Него данну суцу учеником неложному обещанию * Утешителево показующу явление. [Дважды.]

Слава, и ныне, глас 6-й:

Празднику преполовляющуся Твоего, Христе, * Воскресения, * и Божественнаго Пришествия Святаго Твоего Духа, * спешесе чудес Твоих * воспеваем таинства, * воньже низпосли нам велию милость.

Вход. Свете Тихий: Прокимен дне и чтения три:

Пророчества Михеина чтение.

Тако глаголет Господь: от Сиона изыдет закон, и слово Господне из Иерусалима, и судит посреди людей многих, и обличит языки крепкия даже на долзе, яко вси людие пойдут кийждо своим путем, мы же пойдём именем Господа Бога нашего в век. Тако глаголет Господь Вседержитель: услышите холми суд Господень, и дебри основания земли, яко суд Господеви к людем Его, и со Израилем сопрится, глаголя: людие Мои, что сотворих вам; или чим опечалих вас? Отвещайте Ми: зане возведох вы от земли Египетския, и из дому работы избавих вас, и послах пред лицом вашим Моисеа и Аарона и Мариам. Людие Мои помяните убо, что совещах на вас сопротивнии; кто возвести тебе? Возвестих бо тебе, человеце, что добро, или что Господь ищет от тебе, разве творити суд, и любити милость, и готову быти, еже ходити с Господем Богом твоим; зане в крепости возвеличится Господь, и упасет стадо Свое в мире, даже до конец земли.

Пророчества Исаина чтение.

Тако глаголет Господь: жаждущии идите на воду, и елицы не имате сребра, шедше купите, и ядите, пийте без сребра и цены, вино и тук. Яко тако глаголет Господь Вседержитель вам: людие Мои, почерпите воду с веселием от источник спасения. И речеши в день оный: воспойте Господеви, призовите имя Его, возвестите во языцех славная Его: помяните, яко вознесеса имя Его. Людие Мои, услышите Мене, и снесите благая, и насладится во благих душа ваша. Внушите ушима вашима, и последуйте путем Моим. Услышите Мене, и жива будет во благих душа ваша, и завещаю вам завет вечный, и призовите. Внегда же аще приблизитесь Мне, да оставит нечестивый пути своя, и муж беззаконный советы своя, и обратитесь ко Мне, и помилую вас, и оставлю грехи ваша. Не суть бо совети Мои, якоже совети

ваши, ни якоже путие ваши, путие Мои, глаголет Господь. Но якоже отстоит небо от земли, тако отстоит путь Мой от путей ваших, и умышления ваша от умышления Моего. Якоже бо аще снидет дождь, или снег с небесе, и не вратится отгуду, дондеже упоит землю, и израстит, и прозябнет, и даст семя сеющему, и хлеб в снедь: Сице будет глагол Мой, иже аще изыдет из уст Моих, не возвратится ко Мне тощ, дондеже скончает вся, елика восхотех, и исправлю пути твоя, и заповеди Моя. С веселием бо изыдете, и с радостию научитесь: горы бо и холми скочат, чающе вас в радости, и вся древа сельная восплещут ветвьми. И вместо драчия взыдет кипарис, вместо же кропивы взыдет мирсина: и будет Господь во имя, и в знамение вечное, и не оскудеет, глаголет Господь Бог Святый Израилев.

Притчей чтение.

Премудрость созда Себе дом и утверди столпов седмь. Закла Своя жертвенная, и раствори в чаши Своей вино, и уготова Свою трапезу. Посла Своя рабы, созывающии с высоким проповеданием на чашу, глаголющии: Иже есть безумен, да уклонится ко Мне. И требующим ума рече: Приидите, ядите Мой хлеб, и пейте вино, еже растворих вам. Оставьте безумие и живи будете, и взыщите разума, да поживете, и исправите разум в ведении. Наказуяй злыя примет себе безчестие, обличаяй же нечестиваго опорочит себе: обличения бо нечестивому раны ему. Не обличай злых, да не возненавидят тебе. Обличай премудра, и возлюбит тя. Дажь премудрому вину, и премудрший будет. Сказуй праведному, и приложит приимати. Начало премудрости страх Господень и совет святых разум: разумети бо закон помысла есть благаго. Сим бо образом многое поживеши время, и приложатся тебе лета живота.

На стиховне стихиры праздника самогласны, глас 1-й:

Иоанна монаха.

Пятдесятницы наста дней Преполовление, в немже Христос, обнажив маловидно Божественную силу, расслабленнаго стягну словом, того от одра возставив, и Боголепно чудотворяй в зданном теле, человеку дарова вечный живот и велию милость.

Стих: Помяни сонм Твой, егоже стяжал еси исперва.

Во святилище пришел еси, Премудросте Божия, преполовляющуся празднику, уча и обличая непокоривыя иудеи, и фарисеи, и книжники, и вопия со дерзновением к ним: жаждай да грядет ко мне и пьет воду животную и не вжадет вовек: веруяй моей благодати, реки потекут из чрева его жизни вечныя. О, благодати и благоутробия Твоего, Христе Боже наш, слава Тебе.

Глас 2-й.

Стих: Бог же Царь наш прежде века, содела спасение посреде земли.

Егда Преполовление праздника наста, взыде Иисус во святилище, и учаще непокоривыя иудеи, глаголя: жаждай да грядет ко Мне и пьет воду животную, вечную, и не вжадется вовек: веруяй в Мя, реки потекут из чрева его и имети будет Свет Животный.

Слава, и ныне, глас 8-й:

Преполовившуся празднику, учащу Ти, Спасе, глаголаху иудее: како Сей весть писмена, не учився, не разумеюще, яко Ты еси Премудрость, Устроившая мир, слава Тебе.

По **Н**ыне отпускаеши: и по **О**тче наш:

Слава, и ныне, тропарь празднику, глас 8-й:

Преполовившуся празднику, * жаждущую душу мою благочестия напой водами,
* яко всем, Спасе, возопил еси: * жаждай да грядет ко Мне и да пьет. * Источниче
жизни нашея, Христе Боже, слава Тебе.

НА УТРЕНИ

На Бог Господь: Тропарь, глас 8-й:

Преполовившуся празднику, * жаждущую душу мою благочестия напой водами, * яко всем, Спасе, возопил еси: * жаждай да грядет ко Мне и да пьет. * Источниче жизни нашея, Христе Боже, слава Тебе. [Трижды.]

По 1-й стихологии седален, глас 4-й:

Наста Преполовление дней от Спасительнаго начинаемых Возстания, Пятдесятницею же Божественною печатаемое, и светится, светлости обоюду имущее и соединяющее обоя, и приити славе предъявляющее, Владычняго Вознесения предпочитает.

Слава, и ныне: тойже

По 2-й стихологии седален, глас 4-й:

Слыша и возвеселися Сион, благовестившуся Христову Воскресению, вернии же его сынове возрадовашася, сего видевши, омывающа духом скверну христуубийства, готовится, торжествующе, обоих веселое Преполовление.

Слава, и ныне: тойже

Воскресение Христово видевши, * поклонимся Святому Господу Иисусу, * Единому Безгрешному. * Кресту Твоему покланяемся Христе, * и Святое Воскресение Твое поем и славим: * Ты бо еси Бог наш, * разве Тебе иного не знаем, * Имя Твое именуем. * Приидите вси вернии, * поклонимся Святому Христову воскресению: * се бо прииде Крестом радость всему миру. * Всегда благословяще Господа, * поем Воскресение Его: * распятие бо претерпев, * смертию смерть разруши.

По 50-м псалме Канон 1-й, глас 4-й

Песнь 1.

Ирмос: Моря Чермнаго пучину, * немокрыми стопами * древле шествовав Израиль, * крестообразно Моисеовыма рукама, * Амаликову силу в пустыни победил есть.

Запев: Слава Тебе Боже наш, слава Тебе

Велия яже паче ума, Твоего Владыко божественною воплощения благодеяния сияют нам, дарове же и благодати, и божественныя светлости, благоподатно истекают.

Пришел еси Христе, светлости Божества испущая, праздника посреди явленно: праздник бо радостен спасаемым еси, и спасения нашею ходатай.

Премудрость и правда, Господи, и избавление, от Бога Ты бысть нам, и от земли к небесней приводя высоте, и Дух Божественныи даруя.

Богородичен: Плоть Твоя исления во гробе не виде Владыко, яко составися кроме семене, тления не прият исследованием естества, пресуществене, не работавши.

Канон 2-й, глас 8-й

Ирмос: Море огустил еси ...,

Языцы восплещите, евреи восплачите, животодавец бо Христос, узы адовы расторже, и мертвыя воскреси, и недуги исцели словом: Сей есть Бог наш, давший жизнь верующим во имя Его.

Чудо показал еси, воду в вино прешедшую, во Египте реки преложивый, Владыко, в кровь, и мертвыя воскресил еси, знамение сие второе скончав. Слава, Спасе, несказанному Твоему совету: слава истощанию Твоему, имже обновил еси нас.

Струя приснотекущая сый, Господи, жизни истинныя, Ты еси воскресение наше, хотя трудился еси, Спасе мой, и волею вжаждался еси, законом естества повинуюся, и в Сихарь шед плотию, воды просил еси у самаряныни пити.

Хлебы благословил еси, рыбы умножил еси, непостижимый Боже, и люди насытил еси независтно, и источник приснотекущий, премудрость, жаждущим обещал еси. Ты еси Спас Бог наш, давший живот верующим во имя Твое.

Слава, Троицен: Три собезначальны славлю и сопрестольны, Отца безначальна Бога, и Сына собезначальна, и Духа соприсносущна Сыну, едино триипостасное Существо, едино начало пребезначальное пою, безначальнаго Божества и Существа чту.

И ныне, Богородичен: Едина вместила еси Зиждителя Твоего, Богородительнице, во чреве, и плотию родила еси неизреченно, и Дева пребыла еси, ничтоже девству осквернившуся. Сего, Чистая, яко Сына Твоего и Бога непрестанно моли о стаде Твоем присно.

Катавасия: Море огустил еси, * погрузивый со оружием гордаго фараона, * и люди спасл еси немокренно Господи, * и ввел еси я в гору святыни, вопиющия: * поим Тебе Богу нашему песнь победную, яко прославися.

Песнь 3.

Ирмос: Веселится о Тебе церкви Твоя Христе зовущи, * Ты ми крепость Господи, * прибежище и утверждение.

Вод животворных, церкви источник отверзл еси, аще кто жаждет, усердно да приходит и пьет, вопия Блаже. [Дважды.]

От земли убо, на небо вознестися, проявление глаголаше, с небесе же Духа послати обетова Святаго.

Богородичен: Иже естеством животворивый, иже от Девы родивыйся Господь, всем верным дарует бессмертие, яко Благоутробен.

Ин

Ирмос: Утвердися сердце мое во Господе ...,

Не иже на лице суд судите, иудее, уча глаголаше Владыка, егда прииде во святилище, якоже писано есть, преполовившуся законному празднику.

Не иже на лице суд судите, иудее: Христос бо прииде, Егоже нарицаху пророцы от Сиона грядуща и мир взывающа.

Аще и словесем не веруете, иудее, делом веруйте Владыки: что прельщаетеся, отметающеся Святаго, Егоже написа в законе Моисей?

Аще мессии всяко подобает приити, иудее, Христос же прииде ныне Мессиа: что прельщаетеся, отметающеся Праведнаго, Егоже написа в законе Моисей?

Слава, Троичен: Тебе покланяемся, Отче, безначальный Существом, поем безначального Сына Твоего, и Духа благочестно Всесвятаго, яко единого три, естеством Бога.

И ныне, Богородичен: Един от Троицы сый быв, плоть виделся еси, не преложь, Господи, существа, ниже опалив Рождшия нетленное чрево, Бог сый весь и огонь.

Катавасия: Утвердися сердце мое во Господе, * вознесся рог мой в Бозе моем, * разширишася на враги моя уста моя, * возвеселихся о спасении Твоем.

Седален, глас 8-й.

Стоя посреди святилища, * преполовляющуся божествене празднику, * жаждай зываше, да грядет ко Мне и пьет, * пияи бо от сея Божественныя Моя вода, * реки из чрева источит повелении Моих. * Яко иже верует в Мя, посланнаго от Божественнаго Родителя, * со Мною прославится. * Сего ради вопием Ти, * слава Тебе Христе Боже, * яко богато излиал еси воды Твоего человеколюбия рабом Своим.

Слава, и ныне. Подобен:

Премудрости воду и жизни, источая мирови, * всех, Спасе, призываеши почерпсти спасения воды: * Божественный бо закон Твой приим человек, * в себе угашает прелести углие, * отонудуже во веки не вжаждет, * ни престанет насыщения Твоего, Владыко Царю Пренебесный. * Сего ради славим державу Твою, Христе Боже, * прегрешений оставление просяще низпослати богато рабом Твоим.

Песнь 4.

Ирмос: Воздвижена Тя видевши церкви на кресте, * Солнца Праведнаго, * ста в чину Своем, * достойно зывающии, * слава силе Твоей Господи.

Растерзав смерти врата Своею силою, пути жизни сказал еси, и безсмертия двери отверзл еси, иже верою Тебе зовущим, слава силе Твоей Господи.

Преполовение всех и конец имея, и начало яко Безначален обдержа, стал еси посреди вопия, божественных, богомудрии, даров насладитесь.

Яко Бог всех держа власть, яко силен державу низложив смерти, послати обеща Христе Дух Святыи, иже от Отца происходящий.

Богородичен: Даеши богато благодать Тебе поющим, и иже из Тебе Рождышагося Превечнаго Слова, Мати неискусомужная, и согрешением оставление, сим просящи Пречистая.

Ин

Ирмос: Пророк Аввакум ...,

Аще мессии подобает приити, Мессиа же Христос есть, беззаконнии, что не веруете Ему? Се прииде, и свидетельствует, яже Той творит: воду вино сотвори, расслабленнаго словом стягну.

Не разумеюще писаний, прельщаетесь вси вы, евреи беззаконнии: воистинну бо прииде Христос, и всех просвети, и в вас показа многая знамения и чудеса, и в сугубе отрицаетесь истиннаго живота

Едино дело показах вам, и вси уже дивитесь, зываше иудеем Христос. Вы обрезуете и в субботу человека, рече, Мене же что оклеветаете прочее, воздвигшаго словом расслабленного?.

Дела сотворих многая, и коего ради дела камением биете Мя? Иудеем Христос, обличая, зываше: еда зане человека здрава всего словом сотворих, не судите на лице человецы.

Во апостолах действуяй, и во пророцех Сам почиваяй с Духом, безначальное рождение Отческаго естества Христе, языки к познанию возвел еси знаменьми Твоими.

Слава, Троицен: Троице нераздельная Единице, безначальне Отче, Сыне и Душе Святыи, во Единице Троица равночестная, сопрестольная, животворящая, несозданный Боже, спасай воспевающия Тя, и избави от бед и скорбей.

И ныне, Богородичен: Во чреве Твоем Бога неописанно вместившая, Богоневесто, Дево Мати Чистая, не престай молящи о нас, яко да Тобою избавимся от обстояний, к Тебе бо присно прибегаем.

Катавасия: Пророк Аввакум умными очима * провиде, Господи, пришествие Твое, * тем и вопияше: от юга придет Бог. * Слава силе Твоей, слава низхождению Твоему.

Песнь 5.

Ирмос. Ты Господи ми свет, * в мир пришел еси, * во свет святых обраща, * из мрачна неведения, * верою хвалящих Тя.

Божественных праздник преполовение достигше, совершенное божественныя добродетели постигнути, потщимся богомудрии. **[Дважды.]**

Яко воистину священо, настоящее торжество, преполовение бо великих праздник, повелевает и светится обоюду.

Богородичен: Ум ангельский не может разумети Твое не изреченное из Девы, и пречистое Рожество, Спасе мой Всесилне.

Ин

Ирмос: Господи Боже наш, мир даждь нам ...,

Чудесы украсил еси апостолы Твоя, дивесы возвеличил еси ученики, во всем мире прославил, Спасе наш, и дав им Царствие Твое.

Вся просветиша земли концы ученицы, чудесы и ученьми, и различными образы слово проповедавшие, Христе Спасе, Царствия Твоего.

Хвалу возсылаем Царствию Твоему, пение же Тебе приносим, нас ради на земли явившемуся, и мир просветившему, и Адама воззавшему.

Слава, Троицен: Слава Тебе, Отче Святыи, Боже нерожденне: слава Тебе, Слове безлетне единородне: слава Тебе, Душе Божественне и сопрестольне, и единосущне Отцу и Сыну.

И ныне, Богородичен: Бысть чрево Твое святая трапеза, имущая небесный хлеб, от негоже всяк ядый не умирает, якоже рече всех, Богородительнице, Питатель.

Катавасия: Господи Боже наш * мир даждь нам, * Господи Боже наш, стяжи ны, * Господи, разве Тебе иного не вемы, * Имя Твое именуем.

Песнь 6.

Ирмос. Пожру Ти со гласом хваления Господи, * церкви вопиет Ти, * от бесовския крове очищися, * милостию от ребр истекшею Ти кровию.

Преполовление пятьдесятницы наста днесь: отсюда божественая убо Пасха, святая светится, просвещающи божественейшею светлостию, от онуду же Утешителевою благодатию осиявающи.

Преполовление пятьдесятницы наста днесь: отсюда божественая убо Пасха, святая светится, просвещающи божественейшею светлостию, от онуду же Утешителевою благодатию осиявающи.

Глаголаше в церкви Христе предстоя, иудейским собором Свою славу открывая, и предъявляя сродство к Родителю.

Богородичен: Буди ми Предстательница, и Стена нерушимая, от мирских мя соблазн избавляющи, едина Богородительнице, и божественным светолитием освещающи.

Ин

Ирмос: Яко воды морския ...,

Вся содержай концы, возшел еси, Иисусе, и учил еси во святилищи народы слову истины, празднику преполовляющуся, якоже Иоанн вопиет.

Отверзл еси устне Твои, Владыко, проповедал еси миру безлетнаго Отца, и Всесвятаго Духа, сродное обоих храня и по воплощении.

Дело Отчее совершил еси, делы уверил еси словеса Твоя, исцеления совершая Спасе, и знамения, расслабленнаго исправляя, прокаженныя очищая, и мертвыя воскрешая.

Безначальный Сын начало бысть прием, еже по нам вочеловечися, и посреде праздника учаши, глаголя: притецыте ко источнику приснотекущему, жизнь почерпите.

Слава, **Троицен:** Единое в Троице Божество, Существо триипостасное, несозданное, нераздельное вси славим, Отца, и Сына, и Святаго Духа, яко три сущее, и единое.

И ныне, **Богородичен:** Деву по рождестве поем Тя, Деву и Матерь славим Тебе едину, Чистая Богоневесто Отроковице, из Тебе бо воистинну Бог воплотися, обновив нас.

Катавасия: Яко воды морския, Человеколюбче, * волнами житейскими обуреваюся, * темже, яко Иона, тако вопию Ти: * возведи от тли живот мой, * Благоутробне Господи.

Кондак, глас 4-й.

Празднику законному преполовившуся, * всяческих Творец и Владыка, * к предстоящим глаголаше Христе Боже: * приидите и почерпите воду бессмертия. * Тем же Ти припадаем и верно вопием, * щедроты Твоя даруй нам. * Ты бо еси источник животу нашему.

Икос. Олядевшую ми душу согрешенми и беззаконии, кропльми Твоих кровей напой, и покажи плодоносну добродетельми. Ты бо рече всем приходящим к Тебе, слово Божие пречистое, воду нетления почерпите, живу же и очищающую грехи, поющим славное и божественное Твое востание, подая Благии иже с высоты

сошедшую воистину учеником Твоим Духа крепость, Тебе Бога ведящим, Ты бо еси источник животу нашему.

Песнь 7.

Ирмос. В печи Авраамския дети персьстей, * любовию благоверия паче, * нежели пламенем опаляеми взываху, * благословен еси в церкви славы Твоей Господи.

Крепость Спасе смертную разорь силою, стези жизни показал еси человеком, благодарно Тебе зовущим, благословен еси в церкви славы Твоей Господи.

Крепость Спасе смертную разорь силою, стези жизни показал еси человеком, благодарно Тебе зовущим, благословен еси в церкви славы Твоей Господи.

Плоть носяща видяще, не разумеша собори еврейстии слова Тебе Божия. Но мы Тебе воспеваем, благословен еси в церкви славы Твоея Господи.

Богородичен: Вышняго освященно Божие селение, радуйся. Тобою бо дадеса радость Богородице, вопиющим Ти, благословена Ты в женах, всенепорочная Владычице.

Ин

Ирмос: Халдейская пещь ...,

Плотски потрудился еси, упокоение всех: волею вжаждался еси, источниче чудес: воды просил еси, воду жизни, Иисусе, возвещай.

Самаряныни, Господи, жене беседовал еси, обличая безумие беззаконных евреев: она убо верова Сына быти Божия, сии же отвергошася.

Воду живую истекающую, воду безсмертия, источник присноживущий подати обещал еси, верою Дух Твой приемлющим, Спасе, от Отца происходящий.

Пятьми хлебы препитал еси, тысящи алчущих, и насыщения останки, в другия тысящи, Спасе умножил еси, показуя славу Твою священным учеником.

Ядый Тело Твое, жив будет во веки, и пий Кровь Твою, в Тебе пребудет, Спасе мой, и Ты в нем пребываеши, и воскресиши его в последнее мгновение.

Удивил еси, Владыко, Твое смотрение, уверив чудесы Божественную власть, недуги изгнал еси, мертвыя воскресил еси и слепыя просветил еси яко Бог.

Прокаженныя очистил еси, хромыя исправил еси, разслабленныя стянул еси, кровоточивую исцеливый: шествовал еси по пучине, показав славу Твою священным учеником.

Слава, Троицен: Поклоняемся Твоему, Господи, Пречистому Отцу, и благодати Духа, юже Твоим апостолом Бог сый раздал еси, посылая их на проповедь.

И ныне, Богородичен: Во чреве Твоем вместила еси невместимаго Слова, от Твоих сосец доила еси миру Питателя, на объятии носила еси Содержителя нашего, Богородительнице Чистая.

Катавасия: Халдейская пещь, огнем распалаемая, * орошашеся Духом, * Божиим предстоянием, * отроцы пояху: * благословен еси, Боже отец наших.

Песнь 8.

Ирмос. Руце распростер Даниил, * львова зияния в рове затче: * огненую же силу угасиша, * добродетелию преноясавшеса, * иже благочестия любителие отроцы взывающе, * благословите вся дела Господня Господа.

Красен из гроба востав, Своею Божества славою сияя, апостолом Своим Господи явил еси Духа обещание, тем посылая действо, благословите вся дела Господня Господа.

Умертвив ада яко Бог, Живоначальниче, всем источил еси живот вечный. Его же ныне воображают светлейше, светоносных дней сих, радостно вопиющим, благословите вся дела Господня Господа.

Лучы яко солнце Христе правде явися, заря миру послал еси апостолы Своя, носяща Тебе света безсеменного, и неразумия мглу очищающа, вопиющим, благословите вся дела Господня Господа.

Богородичен: Се ныне оскуде яве, от иудина племени князь и вождь: Ты бо Всененорочная родила еси, преже обещавшаго обетования, иже Христа Бога поющим, благословите вся дела Господня Господа.

Ин

Ирмос: Ангели и небеса, на престоле ...,

Приидите видите, людие, на престоле славы воспеваемого, от людей беззаконных хулимаго, и видяще пойте в пророцех Мессию предреченнаго.

Ты еси воистинну Христос, в мир сей пришедый, из Негоже спасение и оставление отеческих согрешений: Ты еси воистинну живот, в Тя веровавшим.

Премудрость Божия, преполовившуся празднику, якоже писано есть, во святилищи предста и учаше, яко воистинну Сей бяше Мессиа Христос, Имже спасение.

В субботах Христос, и по вся дни показоваше знамений дела, исцеляя сущия в недужех различных: но прельщеннии людие яростию распыхахуся.

Разслабленнаго, глаголет, в летех же мнозех лежащаго, в субботу Сей исцели, и преступи закон, иудеи Христа горько укоряху.

Не Моисей ли вам, закон давый, повелевает обрезатися, и в субботу мужа обрезуете, да не како закон отеческий разорится, Христос иудеем глаголаше.

Неблагодарни всегда в пустыни жившии, Благодетеля завистию прогневаху, хуляще, движуще неправедныя языки, тщетным поучающесея.

Благословим Отца, и Сына, и Святаго Духа, Господа.

Троичен: Един Бог убо Троица, Отцу не преступившу в сыновство, ниже Сыну предложшуся во исхождение: но свойтвенная и обоя, Свет Бога, три прославляю во век.

И ныне. Богородичен: Како родила еси, рцы, от Отца безлетно просиявшаго, и со Святым Духом воспеваемого? Или яко весть един благоволивый из Тебе родитися, Богородице.

Таже: Хвалим, благословим, покланяемся Господеви, поюще и превозносяще во вся веки.

Катавасия: Ангели и небеса, * на престоле славы сидящаго * и яко Бога непрестанно славимаго, * благословите, пойте * и превозносите Его во веки.

Честнейшую: не стихословится.

Песнь 9.

Ирмос. Камень нерукосечных горы, * от несекомья Тя Девицы, * краеугольный отсечся Христос, * и совокупив разстоящаяся естества: * тем веселящся, Тя Богородице величаем.

Новому и чистому житию, от Христа научившися, сие даже до конца сохранит, полезно вси потщимся, яко да Свягаго Духа пришествие примем.

В небесное паки житие звани бывши, ходатайственною силою, излиывшагося даже до рабиа образа, и нас вознесшаю, Сего достойно величаем.

Ты мое смертное Живодавче, обложением бессмертия, и нетления благодатию оболк Спасе, воскресил сей, и Отцу привел сей, временную ми разрушив брань.

Богородичен: Яко корень источника, и вину нетления, Тебе Дево вси вернии уведевше, похвалами почитаем. Ты бо составное бсзмертие источила еси.

Ин

Ирмос: Чужде матерем девство ...,

Празднику преполовляющуся иудейскому, возшел еси, Спасе мой, во святилище Твое, и научал еси всех: чудяхуся же иудее, и откуда Сей весть письменна не научився, глаголаху.

Исцеления дарований Избавитель мой источая, сотворяше чудеса и знамения, прогона недуги, целя немощствующия: но иудеи неистовствовахуся множеством чудес Его.

Непокоривыя иудеи Избавитель мой обличая, вопияше: не судите на лице, но праведен суд судите: ибо закон и в субботу обрезоватися повелевает всякому человеку.

Большая чудес учеником Твоим, Спасе, якоже обещав, подал еси, послав в языки проповедати славу Твою: они же миру проповедаху Твое Воскресение, благодать и воплощение.

Аще человека обрезуете в субботу, да не како разорится закон: ныне на Мя что гневаетеся, яко человека всего здрава сотворих словом? По плоти вы судите, глаголет иудеем Христос.

Сухую исцеливый руку словом, изсохшую древле землю моего сердца, исцелив Слове, покажи мя плодоносна, да соделаю и аз Спасе, плоды в покаянии тепле.

Прокаженное мое сердце очистив, и души моя, Слове, очи просветивый, на одре болезни мя лежаща исправи, якоже разслабленнаго возставил еси на одре лежащаго.

Слава, Троицен: Чужде есть беззаконным славити безначальную Троицу, Отца, и Сына же, и Свягаго Духа, несозданное вседержание, Имже весь мир создася державою крепости Ея.

И ныне, Богородичен: Вместила еси во чреве Твоем, Дево Мати, единаго от Троицы Христа Живодавца, Егоже поет вся тварь, и трепещут горнии престолы: Того моли, Всеблаженная, спасти души наша.

Катавасия: Чужде матерем девство, * и странно девам деторождение: * на Тебе Богородице, обоя устроишася. * Тем Тя вся племена земная * непрестанно величаем.

Светилен.

Подобен: Небо звездами:

Жаждай взываше, да грядет ко Мне и пиет, * пияи бо от сея Божественныя Мояя воды, * реки из чрева источит повелении Моих. * Сего ради вопием Ти, * слава Тебе Христе Боже, * яко богато излиал еси воды Твоего человеколюбия рабом Своим. [Дважды.]

Слава, и ныне: тойже

На хвалитех стихиры на 4, глас 4-й:

Подобен: Яко добля:

Премудрость, и сила, Отчее сияние, * Слово присносущное и Сын Божий, * во святилище прииде плотию, * и учаше иудейския люди, жестокия и неблагодарныя, * и удивляхуса премудрости богатству, вопиюще: * откуда весть писмена, ни от когоже учився? [Дважды.]

Книжником затыкаше уста, * иудеи обличаше Мессиа Господь, вопия к ним: * не на лице законопреступницы, яко неправеднии судите, * в субботу бо аз разслабленнаго воздвигнух. * Темже Господь субботы есмь и закона, * что ищите Мене убити, умершия воздвигшаго?

Навуфеа камением побилша, лютии и законопреступнии, * иудейское собрание неблагодарное: * Исаию же пилою древяною растроша, * в кал мудраго Иеремию ввергоша, * Господа же на Крест вознесше взываху: * храм разоряй, спаси Себе, и уверуем.

Слава, и ныне, глас 4-й: Анатолия:

Просветившися братие, * Воскресением Спаса Христа, * и достигше преполовения праздника Владычня, * приискренно сохраним заповеди Божия, * да достойни будем и Вознесение праздновати, * и пришествие получитьи Святаго Духа.

Славословие великое. По Трисвятом, Тропарь, глас 8-й:

Преполовившуся празднику, * жаждущую душу мою благочестия напой водами, * яко всем, Спасе, возопил еси: * жаждай да грядет ко Мне и да пиет. * Источниче жизни нашея, Христе Боже, слава Тебе.

Ектении, и отпуст. И час 1-й.

В СРЕДУ 4-Й СЕДМИЦЫ ПО ПАСХЕ

НА ЛИТУРГИИ

Блаженна от канона праздника, 4-го гласа, на 4, и 8-го гласа, на 4.

Вод животворных, церкви источник огверзл еси, аще кто жаждет, усердно да приходит и пьет, вопия Блаже. [Дважды.]

От земли убо, на небо вознестися, проявление глаголаше, с небесе же Духа послати обетова Святаго. [Дважды.]

Дело Отчее совершил еси, дела уверил еси словеса Твоя, исцеления совершая Спасе, и знамения, разслабленнаго исправляя, прокаженныя очищая, и мертвыя воскрешая.

Безначальный Сын начало бысть прием, еже по нам вочеловечися, и посреде праздника учаше, глаголя: притецйте ко источнику приснотекущему, жизнь почерпите.

Слава, **Е**дино в Троице Божество, Существо триипостасное, несозданное, нераздельное вси славим, Отца, и Сына, и Святаго Духа, яко три сущее, и едино.

И ныне, **Д**еву по рождестве поем Тя, Деву и Матерь славим Тебе едину, Чистая Богоневесто Отроковице, из Тебе бо воистинну Бог воплотися, обновив нас.

По входе тропарь праздника, глас 8-й:

Преполовившуся празднику, * жаждущую душу мою благочестия напой водами, * яко всем, Спасе, возопил еси: * жагдай да грядет ко Мне и да пьет. * Источниче жизни нашея, Христе Боже, слава Тебе.

Слава, и ныне: кондак, глас 4-й:

Подобен: Вознесыйся:

Празднику законному преполовляющуся, * всех Творче и Владыко, * к предстоящим глагола еси, Христе Боже: * приидите и почерпите воду бессмертия. * Темже Тебе припадаем и верно вопием: * щедроты Твоя даруй нам, * Ты бо еси Источник жизни нашея

Прокимен апостола, глас 3-й:

Велий Господь наш, и велия крепость Его, * и разума Его несть числа.

Стих: Хвалите Господа яко благ псалом: Богови нашему да усладится хваление.

Апостол Деяний, зачало 34. [Деян. 14, 6 – 18]:

Во дни оны, Павел и Варнава прибегоста во грады Ликаонския, в Листру и Дервию, и во окрестныя их, и тамо беста благовестующа. И некто муж в Листрех немощен ногама сядяше, хром от чрева матери своея сый, иже николиже бе ходил. Сей слышаше Павла глаголюща: иже воззрев на нь и виде, яко веру имать здрав быти, рече велиим гласом: тебе глаголю во имя Господа Иисуса Христа, встани на ногу твою прав. И абие вскочи и хождаше. Народи же видевшие, еже сотвори Павел, воздвигоша глас свой, ликаонски глаголюще: бози уподобльшися человеком снидоша к нам. Нарицаху же убо Варнаву Диа, Павла же Ермиа, понеже той бяше начальник слова. Жрец же Диев, сущаго пред градом их, приведе юнцы, и принесе венцы пред врата, с народы хотяше жрети. Слышавша же апостола Варнава и Павел, растерзавша ризы своя, вскочиста в народ, зовуща и глаголюща: мужие, что сия

творите? И мы подобострастна есма вам человека, благовествующа вам, от сих суетных обращаться к Богу живу, Иже сотвори небо и землю, и море и вся, яже в них. Иже в мимошедшия роды оставил бе вся языки ходити в путех их. И убо не несвидетельствована Себе остави, благотворя, с небесе нам дождевы дая, и времена плодоносна, исполняя пищею и веселием сердца наша. И сия глаголюща, едва устависта народы не жрети има, но отыти коемуждо во свояси.

Аллилуиа глас 1-й: Помяни сонм Твой, егоже стяжал еси исперва.

Стих: Бог же Царь наш прежде века, содела спасение посреде земли.

Евангелие Иоанна, зачало 26. [Ин. 7, 14 – 30]:

В преполовение Пяьдесятницы взыде Иисус во церковь, и учаще. И дивляхуся иудее, глаголюще: како Сей книги весть не учився? Отвеща убо им Иисус и рече: Мое учение несть Мое, но Пославшаго Мя. Аще кто хочет волю Его творити, понимает о учении, кое от Бога есть, или Аз от Себе глаголю. Глаголай от себе, славы своя ищет, а ищяй славы Пославшаго Его, Сей истинен есть, и несть неправды в Нем. Не Моисей ли даде вам закон; и никтоже от вас творит закона. Что Мене ищите убити? Отвеща народ и рече: беса ли имаши; кто Тебе ищет убити? Отвеща Иисус и рече им: едино дело сотворих, и вси дивитесь. Сего ради Моисей даде вам обрезание, [не яко от Моисеа есть, но от отец,] и в субботу обрезаете человека. Аще обрезание приемлет человек в субботу, да не разорится закон Моисеов: на Мя ли гневаетесь, яко всего человека здрава сотворих в субботу? Не судите на лица, но праведный суд судите. Глаголаху убо нецьи от иерусалимлян: не Сей ли есть, Егоже ищут убити? И се, не обинуясь глаголет, и ничесоже Ему не глаголют: еда како разумеша князи, яко Сей есть Христос? Но Сего vemos, откуда есть. Христос же егда приидет, никтоже весть, откуда будет. Воззва убо в церкви уча Иисус и глаголя: и Мене весте, и весте, откуда есмь, и о Себе не приидох, но есть истинен Пославый Мя, Егоже вы не весте. Аз вем Его, яко от Него есмь, и Той Мя посла. Искаху убо, да имут Его: и никтоже возложи Нань руки, яко не у бе пришел час Его.

На Литургии поем и на отдание Преполовения:

Вместо Достойно: ирмос, глас 8-й:

Ирмос: Чужде матерем девство, * и странно девам деторождение: * на Тебе Богородице, обоя устройшася. * Тем Тя вся племена земная * непрестанно величаем.

[В прочия же дни поем: Светися: и до отдания.]

Причастен: Ядый Мою Плоть, и пияй Мою Кровь, во Мне пребывает, и Аз в нем, рече Господь. Аллилуиа, [трижды.]